

丁文誠公奏稿

丁文誠公奏稿

卷之二十三目錄

查明歷年添裁營勇並現存勇數摺

光緒九年三月初六日

勇營難再裁減摺

光緒九年三月初十日

裁撤夫馬局奏請立案摺

光緒九年六月二十九日

辦理積穀上倉數目摺

光緒九年六月二十九日

四子壽鶴以主事用謝恩摺

光緒九年六月二十九日

城口廳添設學額片

同日

土司構衅委員查辦片

光緒九年七月二十日

川省盜案仍照前奏章程辦理片

光緒九年七月二十九日

復開機器局報銷用款摺

光緒九年八月三十日

清查庫款完竣摺

光緒九年九月二十九日

變通補缺章程摺

光緒九年九月二十九日

土司構衅查辦完結摺

光緒九年十一月初二日

官運鹽局實支實銷並無閒款片

同日

法人併越擬練川兵以備緩急摺

光緒十年正月十一日

預防法人句結日本片

同日

成都駐防添設拔額摺

光緒十年正月二十四日

川省應解京餉仍發商匯兌片

同日

喇嘛攘奪廓商財物派員查辦摺

光緒十年二月十二日

解部減平減成等款仍留川備撥片

光緒十年二月二十八日

查明收支庫款並弁勇數目摺

光緒十年四月二十九日

查明歷年添裁營勇並現存勇數摺

光緒九年三月  
初六日

奏爲查明川省歷年添裁營勇數目起止月日及現存勇數恭摺具奏仰祈

聖鑒事案准戶部咨將現在軍需辦理善後章程暨現有兵數勇數支發章程並奏咨各案遵照奏定三箇月限期趕緊詳細造冊送部以憑辦理並開具前奏條款一紙又查八年十一月三十日准戶部咨將歷年添裁各勇名目起支住支口糧日期以及欠餉已否找清暨現存勇數月需餉銀若干迅速據實逐一查明分晰報部各等因准此當卽先後轉行籌餉局司道遵照辦理去後茲據該司道等會詳遵查川省辦理軍需以來陸續招募裁減兵勇數

目前已按年造具征防處所清冊報至光緒元年年底止其自二年正月起先後添裁勇丁數目均隨時奏明計截至八年年底止除裁減外實存東勇九千六百一十名川勇二千一百四十五名漢土兵丁六百七十二名操演旗綠各營精兵一千五百名均係逐名核實歷有奏案可查至前募傑勇一百名楚勇二千名亦係前護督臣文格於光緒二年五月初七日附奏川省實在情形議請添募楚勇摺內一併奏明之件茲將二年起至八年止歷次添裁兵勇名數起住月日奏報原案及現存兵勇數目謹遵新章逐一造具清冊並鈔錄前募傑勇楚勇原奏先行送部查核各營文武員弁銜名容於征防冊內趕緊挨年造報

又川省支發勇糧章程向有楚黔川勇之別歷年支銷數目前經按年造冊銷至光緒元年年底止後因楚黔勇糧過優於光緒三年援照山東勇章量爲裁減期歸樽節亦經隨時奏明奉

旨允准所有光緒二三年支發楚黔川勇口糧三年以後支發東勇川勇口糧並一切員弁薪水軍火雜支等項均係按照奏定章程軍需則例准銷成案核實支發並無格於定章例外支銷之款亦未另立善後章程又現存各營兵勇照章應領口糧並應支員弁薪水軍火工料暨一切雜支之項除安定營勇糧由黔滇鹽務局支發外約計每歲尙須銀八十餘萬兩又歷年裁減勇丁應找口糧均

已找清惟同治七八等年援勦黔匪採辦軍糧尙欠管帶  
果毅副營記名提督劉鶴齡墊支運費銀一萬三千零八  
十七兩二錢六分管帶振武軍記名提督唐友耕等墊支  
運費銀七千五百一十兩八錢八釐均係報部准銷之項  
因值庫儲竭蹶未經給發現奉戶部奏定新章第十一條  
內開司庫未發軍需欠餽截清數目報部以後補發之時  
專案咨報方准核發等因所有前項欠發銀兩係已報部  
開除之項現既多年未經給發應請收回軍需項下歸入  
光緒二年報銷案內作爲收款造報俟將來補發之時再  
行報部動款支給以昭核實等情並造具清冊四本具詳  
請奏前來臣覆查無異除將清冊咨送兵部查核暨咨戶

部工部查照並札飭籌餉局司道等以後遇有增減隨時  
專案奏咨一面將光緒二年起應造各營員弁兵勇征防  
處所清冊並支發勇糧雜用等項上緊挨年造報請銷外  
所有查明川省歷年添裁營勇數目起止月日及現存勇  
數緣由謹恭摺具奏伏乞

皇太后

皇上聖鑒訓示謹

奏



勇營難再裁減摺

光緒九年三月初十日

奏爲川省勇營勢難再議裁減請俟邊防靜謐匪類肅清再行酌辦據實陳明仰祈

聖鑒事竊照前准軍機大臣字寄光緒八年十二月初四日奉

上諭兵部奏請飭裁各省防勇確核兵額以節餼需一摺著該督撫等各就該省情形悉心酌度奏明辦理原摺均著鈔給閱看將此諭令知之欽此遵

旨寄信前來並鈔錄原奏一紙等因承准此當卽轉行籌餉局司道欽遵辦理去後茲據該司道等詳稱查川省僻處西陲幅員數千里西北緊連夷地時虞番蠻出擾東南

接壤滇黔又屬伏莽繁多兼以內地之囑匪會匪梟匪以及各邊游勇散練或聚或散不時出沒最易滋生事端全賴各營勇丁隨時更調實力防範藉以消患未萌上年奉旨飭裁勇營以節經費而通盤籌畫極力騰挪僅於各營酌減一成共裁勇一千二百名實以地方遼闊防不勝防出乎萬不得已非不知中外庫藏支絀不復設法撙節也

茲經兵部奏奉

上諭飭令於制兵中查缺額汰老弱裁汛鋪挑補管勇作爲練軍洵爲裁勇節用之美意良法如果川省兵勇尙可設法裁汰敢不竭力遵辦以期有神庫儲無如川省邊防緊要隱患實多前已極力裁減現存各營勇丁尙屬不敷

分防斷不敢曲爲塞責致留意外之虞此川省營勇勢難再減之實情也至川省各營制兵雖有三萬餘名除換防臺藏兵丁二千餘名分防一百餘廳州縣塘汛兵丁數千名又分駐松建維懋馬雷峩越各邊防營汛兵丁一萬數千名其兵力已極單薄卽邊營兵丁一萬數千名而分布於數十營中亦屬爲數無幾且各邊營汛近接夷疆隘口紛歧近來番夷狡詐異常旋服旋叛時有出巢滋擾之事各營兵丁擇要設防不敷布置尙須借資勇營之力如再另議裁減於邊防不無關繫其各州縣塘汛兵丁雖覺散處無多似於地方無裨但川省囑匪會匪素稱難治近年加以游勇散練不時往來竊發緝捕巡邏尤關緊要各州

縣額設捕役爲數有限全賴汛兵通力合作亦尙有不敷  
緝捕之時前曾招募傑勇團勇等營藉資巡緝卽可概見  
若再汰除塘汛兵丁則捕務益鬆匪勢益熾尤於地方關  
繫匪輕况近年營務事事核實亦無虛懸名糧及以老弱  
充數堪以汰除挑補之額此又川省制兵不能議裁之實  
情也所有部議汰兵裁勇之處似未便稍涉遷就遽議更  
張致滋貽誤請從緩酌辦以維大局各等情詳請具奏前  
來查酌裁勇營節省饒需爲當今第一要務臣自東到川  
至今六稔目擊川省庫款支絀每於接見司道時未嘗不  
動色相告勸以節省查川省庫款除綠營兵饒而外以勇  
糧一項爲大宗茲值庫款支絀之時又欽奉

明諭飭裁勇營正可及時減裁上以裕

國家之經費下以遂節省之初心無如詳查大局勢有難行患多伏於未萌事每誤於大意據該司道等具詳各節均屬實在情形並無虛飾若徒爲節省起見強爲曲從於川省不無關繫臣再四思維與其遷就以貽誤不如據實以直陳相應仰懇

天恩俯念川省防務緊要隱患實多容臣查看情形將來地方實在安靖再將勇營酌量裁減以節餽需而維大計不勝屏營待

命之至再前准戶部議奏外省報銷章程十四條內載各州縣添設防勇於三月內一律裁撤等因覆查川省各州

縣從前辦防招募勇丁均於事後悉數裁撤惟馬雷峩越四廳夷匪不時滋擾兵力不敷分防不能不酌留勇丁分頭防禦以衛地方核與內地州縣情形不同且現當巡防緊要勢難再議減裁合併陳明所有川省勇營難再裁減請俟邊防靜謐匪類肅清再行酌辦緣由謹恭摺具奏伏乞

皇太后

皇上聖鑒訓示謹

奏

裁撤夫馬局奏請立案摺

光緒九年六月二十九日

奏爲裁撤夫馬局請

旨立案以垂久遠恭摺具奏仰祈

聖鑒事竊查川省自同治初年本省鄰省軍務緊急各處徵兵防勦地方供給兵差始創設夫馬局由地方官委紳設局按糧派錢預備支應其初專爲防勦緊要辦理兵差而設原爲萬不得已之舉迨後軍務肅清兵勇大半遣撤而各廳州縣積習相沿仍藉支應兵差名色任意苛派夫馬盈千累萬有較正供浮多加至數倍地方官以此爲應酬入私之具局紳以此爲迎合漁利之階小民脂膏半入官紳私橐二十餘年視爲固有民力幾何豈堪長此剝削

雖前督臣吳棠查明分別裁撤酌減而各局仍多藉口差使大都陽奉陰違臣於光緒三年到川民間具控夫馬之案層見疊出民情嗟怨困苦堪憐當經通飭一律裁撤惟查南路之雅安邛州上至省城由省至北路廣元出境十八州縣爲藏差喇嘛學差試差往來要道例有支應不能不稍爲酌留以資津貼仍飭由臣親爲核定於向派錢數大加刪減以杜侵蝕而紓民力其餘各屬均自光緒三年起一律全撤不准再派民間分文如違嚴參懲辦嗣據各廳州縣陸續稟報裁撤復經遴委賢員分赴各屬明查暗訪亦尙無巧立名目影射私收情事至今數年以來民力稍紓應供之差亦無貽誤現在各廳州縣均尙恪遵辦理



第恐歷久弊生不肖官紳復萌故智仍藉詞添設夫馬局亦不可不預防合無仰懇

天恩俯准

勅部立案以垂久遠以後如有不肖州縣擅自開端私行攤派一經發覺除將該牧令嚴行參辦外並請將遽行批准及失察之總督藩司一併降級示懲俾川中士民長獲休息上副

聖主軫念民艱之至意除將酌留夫馬之十八州縣另繕清單恭呈

御覽並咨部外理合恭摺陳奏伏乞

皇太后

皇上聖鑒訓示謹

奏

謹將酌留夫馬各州縣開列清單恭呈

御覽

北路

成都縣新都縣漢州德陽縣羅江縣緜州梓潼縣劍州昭  
化縣廣元縣

南路

華陽縣雙流縣新津縣邛州名山縣雅安縣清溪縣榮經  
縣

以上十八州縣爲駐藏大臣喇嘛及學差試差往來必由  
之路例有支應應請酌留夫馬

辦理積穀上倉數目摺

光緒九年六月二十九日

奏爲川省初次勸辦積穀收齊上倉並二次三次續辦積穀收有成數恭摺具奏仰祈

聖鑒事竊查川省山多田少戶鮮蓋藏生齒日繁民無蓄積卽比歲豐收尙恐人多糧少不敷使用一遇水旱偏災更有不堪設想者臣於光緒三年到川目擊情形深爲顧

慮當經通飭各屬一律勸辦積穀以備荒歉業將勸辦大概情形奏報在案又因川北一帶不產穀米積穀爲難復經奏明酌撥鹽釐銀兩發給緜州三臺等十一州縣分別買穀存倉以資備禦嗣據各該廳州縣先後稟報共捐積倉斗穀七十三萬一千九石零又撥發鹽釐共採買倉斗

穀二萬七千六百三十八石零隨卽遴委賢員分往各屬  
查驗均係乾圓潔淨堪以經久會同各該地方官取具經  
管紳首實收切結存案嗣於七八兩年連慶豐收糧價較  
減臣察看情形尙可續辦積穀以期圖匱於豐爲有備無  
患之計先後通行各屬體察地方情形酌量勸辦仍照上  
屆章程百分捐一不許格外苛派抑勒該大小糧戶亦以  
上屆辦理並無紛擾所積穀石均由該紳糧等自行經管  
絕無弊混均各欣然樂從爭先恐後實非意料所及除邊  
瘠州縣及偶被偏災收成歉薄之區免辦外旋據各廳州  
縣陸續稟報二次共收倉斗穀二十九萬一千七百七十  
一石七斗零三次共收倉斗穀一十六萬六千四百三十

六石九斗零復經臣委員前往查明實存在倉取結稟報其餘已捐未收之穀爲數無幾或因收成較歉或因穀質不佳均限本年秋收後完納容俟收齊上倉再行奏報除將各廳州縣捐穀數目分別按年造冊送部查核外所有川省初次積穀收齊上倉並二次三次續辦積穀收有成數各緣由理合恭摺具奏伏乞

皇太后

皇上聖鑒訓示再六年初辦積穀各屬稟報收數倉斗市斗不一現在一律折合倉斗是以數目與前奏已收之數不符合併聲明謹

奏

四子壽鶴以主事用謝 恩招

光緒九年六月二十九日

奏爲叩謝

天恩仰祈

聖鑒事竊 臣接閱本科會試新貢士等引

見邸鈔得悉 臣子壽鶴由庚辰科貢士恭應

殿試第二甲

欽點主事分部學習感激私衷匪可言喻伏念 臣黔陬下

士三升列選造之班蜀土備員六載乏涓埃之報影纓瀛

島慚貽翼之無方振佩石渠幸傳薪之有在 臣子壽鶴質

原庸魯雖勤肆夫楹書性實頡蒙未徧窺夫典籍分職榮

膺乎部屬寸衷彌惕乎淵深 臣惟有勛子以專心供職勿

忘鵜翼之箴規潔已從公稍答

鴻慈之高厚所有

微臣

感激下忱理合恭摺具奏伏乞

皇太后

皇上聖鑒謹

奏



城口廳添設學額片 光緒九年六月二十九日

奏爲請增城口廳學額以育人才恭摺具奏仰祈

聖鑒事竊查綏定府屬之城口廳自道光二年議將太平廳移設城口改爲城口廳太平仍復爲縣太平額定文武學各五名城口廳額定文武學各三名迄今六十餘年士子亦多嚮化人文日盛應試人數較之太平不甚懸殊光緒二年前學臣張之洞以該廳文風頗有可觀撥進府學歲科各一名徒以限於學額不免有遺珠之歎應請增文武學額各二名連原額三名共成五名俾與太平學額同歸一律免致向隅由藩司具詳前來臣覆查該司所詳係爲鼓勵學校起見合無仰懇

天恩俯准將城口廳文武學額各加二名連原額定爲五  
名以育人才出自

鴻慈除咨部外謹會同學政臣邵積誠合詞恭摺具奏伏  
乞

皇太后

皇上聖鑒訓示謹

奏

土司構衅委員查辦片

光緒九年七月二十日

再川省藏衛地方各處夷地均歸各土司管轄該土司等自爲雄長各不相下其地又犬牙相錯每因細故彼此動輒稱兵攻擊雖蠻觸相爭事所常有而互相殘殺究屬目無法紀若不及時妥爲查辦既屬不成事體且尋衅不已竊恐另滋事端臣等每於各臺文武員弁到臺必諄囑將各路土司妥爲駕馭令其各安住牧俾得永靖邊陲固未敢稍涉大意也茲據建昌道寶森接據打箭鑪廳營暨糧員嵇志文等稟報該廳北路麻書孔撒各土司以骨肉之親肇忿爭之禍彼此攻擊互相殺傷各向所親乞師助戰現在探得麻書章谷瞻對爲一黨孔撒朱窩白利爲一黨

各土司等前赴打箭鑪廳營具訴經廳營會同委員前往  
開導諭令罷兵章谷麻書土司均已遵斷惟孔撒執拗不  
遵圍困章谷官寨燒燬夷房多間並殺斃夷民多名麻書  
土司遂糾邀瞻對番官派來馬上四五十人搬來綽斯甲  
四五百人孔撒亦搬來德格五六百人盤踞甘孜一帶地  
方相持不下現在擾及大道進藏茶路亦多梗塞商賈裹  
足夷民間風亦紛紛搬徙稟請遴委大員前往查辦示威  
懲創以彰法紀等情據此查各土司地界距前藏甚遠距  
打箭鑪廳城亦遠夷性犬羊其稱兵構衅事所恆有但孔  
撒土司既經打箭鑪廳營委員開導諭令罷兵章谷麻書  
均已遵斷該孔撒土司竟敢抗違不遵實屬目無法紀且

瞻對歸達賴喇嘛管轄與各路土司各有界限茲亦聽糾恃強助虐尤屬膽大妄爲况茶路梗阻尤關繫藏中大局此時若遽聲罪致討則動衆興師似亦非宜惟有遴委明廉大員前往籌辦務令兩造及時撤退一面根究起衅緣由持平斷結方爲正辦查有候補知府慶善人極明練熟悉夷情現已札委該員並調派打箭鑪官土兵三百名隨帶前往相機妥辦務令該土司等各息紛爭共安住牧以期仰副

朝廷綏靖邊陲之至意除咨明駐藏大臣嚴飭商上轉飭番官毋得妄爲生事外所有麻書孔撤各土司稱兵構衅委員前往查辦緣由謹會同成都將軍宗室臣岐元附片

具陳伏乞

聖鑒訓示謹

奏

川省盜案仍照前奏章程辦理片

光緒九年七月二十九日

再光緒八年六月三十日准刑部咨尋常盜案現已解勘具題者仍令照例解勘未經奏明解勘者統子限一年一律規復舊制儻實係距省篤遠地方長途恐有疏虞酌照秋審事例將人犯解赴該管巡道訊明由督撫分別題奏不准援就地正法章程先行處決以重刑典而免冤濫於光緒八年四月初三日奏奉

諭旨依議欽此隨查光緒七年七月二十日欽奉

上諭以御史胡隆洵奏請將盜案仍照舊例分別首從辦理一摺飭部議奏經部議請將就地正法先行停止仍請旨飭督撫臣體察情形迅速妥議具奏等因臣就川省現

在情形詳加查核照前署臬司崇綱所議擬請嗣後州縣報獲盜犯如係道府同城卽飭該管道府就地親提審訊如非同城而距省近者由省遴委道府大員遠者卽酌委本管道府或鄰封州縣前往提訊果係賊證確鑿情無可疑仍稟請在本地正法俾已犯者不致久羈囹圄另生他變未犯者亦能觸目驚心稍知畏懼等情奏奉

諭旨刑部知道欽此欽遵在案茲准部咨欽奉前因查川省於八年六月三十日接准部咨予限一年現在已屆一年限滿自應遵照辦理何敢再事煩瀆但臣詳繹部議必須奉到部覆後始准正法不准先行處決意在慎重刑章用以推廣



皇仁惟讞獄固貴詳慎而立法尤在因時查咸豐三年前督臣裕瑞奏請就地正法緣以川省盜匪之多甲於天下其名目有啣匪會匪梟匪之分近復加以燒香結盟之徒暗中糾聚匪黨之多至爲可慮故近年辦理雖嚴而搶劫之案尙復層見疊出又川省地方遼闊各屬距省多有三十餘站之遠每解一犯所費甚鉅地方官多因解費無措往往諱飾銷弭然緝捕稍一廢弛盜賊愈肆強暴從前川省百姓之畏盜甚於畏虎甚至官紳之家亦多有與盜潛通者殆懼其搶掠報復不得不爲自保之計也地方情形如此不得已始籌變通辦法訊明後卽在本地立予正法俾該處人民觸目驚心知所畏懼固非因軍興後始用重

典况繩之以法必須實有真贓給主認領及夥盜互相質證訊明其何人起意糾搶何人喝眾行強何人把風接賊何人下手拒捕何人知情分贓何人臨時不行亦未分贓一一訊實乃爲之據情定案分別輕重擬辦原非一係搶案卽概爲駢誅是川省之辦盜案尙覺詳慎今一旦責令層層解勘分別題奏於奉

旨後然後正法固爲正辦但其閒往返耽延至速亦須半年之久且在省處決時過境遷該匪之正法與否本地匪徒毫無見聞百姓亦無從知悉殊不足以昭儆戒又近省與遠省雖有招解不招解之分而四川省城以成縣所屬爲最近亦以成縣所屬盜案爲最多卽成縣所屬州縣亦

有距省在三四百里以外者長途之疏脫堪虞差役之解費難辦各地方官藉此諱飾銷弭均屬意中之事又若輩兇狡性成自知所犯甚重招審無不翻供卽不得不提失主保甲質證一經提質則廢時失業者又不知凡幾是正盜率得稽延顯戮而平民既經被搶於前復受拖累於後更非所以安良善也雖委員提審亦常有翻供提質者而就近備質與解省備質其受累之輕重迥然不同况既經該管道府提審又由省委道府大員鄰封州縣往訊核與招解到省事異而情同如果案情稍涉疑竇孰肯以人命作人情草率了事妄行稟請就地正法自干嚴譴卽州縣或有含混之處而臣等於盜案重情亦必詳細推求以贖

證確切爲憑斷不敢遷就率准照辦也查臣自東到川至今業已六稔川省情形知之最熟奉

旨後復悉心體察歷時又屆一年盜風迄難遽息只緣川省地廣人稠而邊境遼遠異常夷漢雜居極易藏奸而人心又極浮動啗匪會匪梟匪無處無之而游勇敢練又復時虞勾結且地方貧民極多失業之人徧地皆是名爲無事實則可憂臣籍隸貴州目擊從前撫臣賀長齡諸事務從寬大由是苗教各匪各立名目毫無忌憚一經倡亂蹂躪全省至今尙未能復元又前此髮匪洪秀全等之亂實由前廣西撫臣鄭祖琛意在姑息將地方官已經拏獲之首匪全數寬縱遂至虎兕出柙天下均遭荼毒前車可鑒

後患難防况治蜀尙嚴古有明訓就川省現在情形而論  
臣旦夕籌維實有稍縱卽逝之勢若稍依違遷就恐養癰  
貽患必至不可收拾故臣於盜案不敢遽言規復舊制者  
實關繫川省大局亦卽關繫東南各省大局其解省之中  
途脫逃證佐之因案受累猶其小焉考之今無仰懇

天恩俯念川省與別省情形不同准如臣所奏以後州縣

報獲盜犯道府同城卽由該管道府提審如不同城而距  
省近者由省遴委道府大員遠者卽酌委本管上司或鄰  
封明幹州縣前往提訊如實係賊證確鑿案無疑竇仍准  
請就地正法再由臣督同臬司詳細推究可准則准稍有  
疑義嚴飭再行確訊另稟核辦將強暴知戒良善獲安庶

以仰副

聖朝刑期無刑辟以止辟之至意臣實爲因時因地起見

固不敢希圖簡便置

成憲於不顧亦不敢草菅人命予地方官以生殺之權更不敢固執已見執原奏而期在必行自問無欺用敢據實直陳所有川省盜案請仍照前奏定章程辦理俟地方實係安靖盜賊果能斂迹再行照舊辦理實爲大有裨益除咨部外理合附片具陳伏乞

聖鑒訓示謹

奏

復開機器局報銷用款摺

光緒九年八月三十日

奏爲川省機器局支用經費開單具報恭摺仰祈

聖鑒事竊查川省前設機器局自光緒三年十月起至五年三月撤局之日止業將支用經費數目據實開單奏報在案茲據辦理機器局署成縣龍茂道丁士彬委員候補道黃錫燾等會詳查川省上年創設機器局製造槍藥經營兩年規模甫定旋即停撤諸事既已廢弛而工匠人等亦均紛散回籍嗣於光緒五年奉

旨復開當經分別札調前管委員帶同工匠來川遵於六年四月十八日開局做造外洋機器槍藥等件辦理漸已齊全現計修理水輪機器及各項機器九千七百四十件

各營舊洋槍三百零五桿續造機器二百五十五種造成  
前後膛洋槍四千八百一十五桿已成藥彈二千顆銅帽  
二萬顆已成洋火藥四萬九千六百六十五觔均經試放  
合用已陸續運送籌餉局加謹存儲以備應用其未合成  
槍藥多件歸入下次報銷所有按月支用經費仍照原奏  
不動司庫正款均於土貨釐金項下支用計自光緒六年  
四月十八開局起截至八年十二月底止共支用過庫平  
銀一十六萬四千五百一十八兩一錢七分五釐二絲四  
忽七塵連委員薪水匠作工資及修理廠房局庫購買彈  
壳銅帽機器全部鋼鐵銅鉛硝磺等項一併在內均係實  
用實銷該道等督同各委員逐款核算明確尚無浮冒撥



照前案開具清單詳請奏咨前來臣覆加查核無異惟此  
項製造一切均係做照西式辦理卽購買之機器銅鐵各  
件向無例案可循是以上屆報銷按照各省機器局開單  
奏咨查銷此次報銷自應援案辦理除分咨總理衙門暨  
戶工二部查核外理合恭摺陳奏並照繕清單恭呈  
御覽伏乞

皇太后

皇上聖鑒訓示謹

奏

謹將川省機器局自光緒六年四月十八開局起截至八年十二月底止實支實用經費數目開具清單恭呈

御覽

一 管收先後支領成縣道收存土貨釐金庫平銀共一十六萬四千五百一十八兩一錢七分五釐二絲四忽七塵  
一 開除給發製造委員會昭吉等來川盤費庫平銀四百二十二兩八錢

一 給發修理廠房鑪座煙筒並購買地基營造火藥局火藥庫並局中加高機器各廠振樓安置彈壳銅帽機器及添修熟鐵鍋鑪等廠房屋項下共支庫平銀二萬八千四百六十六兩九錢四分三釐一毫四絲九忽三微五塵

一給發兩次上海購買外洋彈壳銅帽機器全部及各機器鍋爐洋銅鐵銼物料等件並運腳盤費等項共支庫平銀三萬八千二百七十一兩五分九釐

一給發製造洋槍洋火藥銅帽藥彈機器等件購買鋼鐵銅錫煤炭硝磺及一切雜用物料等項共支庫平銀二萬八千四百九十四兩九錢二分六毫五絲一忽八微二塵一給發委員司事薪水並機器匠作辛工及一切夫役工食等項共支庫平銀六萬八千八百六十二兩四錢五分二釐二毫二絲二忽九微

以上統共支用庫平銀一十六萬四千五百一十八兩一錢七分五釐二絲四忽七塵前領之款別無存贖

清查庫款完竣摺

光緒九年九月二十九日

奏爲遵

旨清查川省庫款完竣恭摺具奏仰祈

聖鑒事竊查前准部咨奉

上諭前據張之洞奏請設局清查晉省庫款當經降旨准  
行茲據御史梁俊奏藩庫積弊恐不獨晉省爲然請飭各  
省將籌墊濫支撥抵借動隱匿等弊一律設局清釐等語  
各省庫儲款項國帑攸關不容絲毫弊混歷年以來籌辦  
軍需善後等事款目繁多官非一任難保無前項情弊著  
各直省督撫做照山西清查章程將藩庫各款一律勒限  
清釐務當破除情面認真辦理以重帑項而清積弊至應

放應緩各款尤宜隨時查覈毋任稍涉含混欽此等因咨  
行轉飭欽遵辦理嗣據前藩司鹿傳霖詳請設局委員清  
查業經臣將設局日期奏明在案茲據布政使張凱嵩詳  
稱前藩司鹿傳霖任內奉札清查庫款於光緒九年正月  
二十一日設局委員清查未竣交卸該司莅任復督飭委  
員自道光二十八年清查竣事起至光緒八年年底止按  
照簿籍分年分款窮源竟委澈底清釐查得川省正雜錢  
糧歷係年清年款年例應支之項歷係按年支銷軍需另  
立專支不與司庫牽混放款遇事詳明無不力求覈實並  
無籌墊濫支撥抵隱匿等弊惟咸豐同治以來籌濟鄰省  
協饗支應本省軍需一時難於周轉騰挪挹注在所不免

各前司任內雖經隨時清查未能條分縷析現經分款核  
明應更正者更正應撥還者撥還一律各清各款其有應  
報撥而未報撥者共銀五千餘兩俟於十年春撥冊內入  
冊報撥又應解還各省尙未解還者共銀一萬餘兩一俟  
遇有便員卽行詳明委解又歷年收支津貼捐輸釐金軍  
需等項尙未報銷者現均趕緊分款造銷又軍需項下尙  
有報部准銷援黔運米腳價銀二萬五百九十八兩六錢  
八釐前因庫儲竭蹶未經支給業經奏明提還原款俟將  
來請領至日再行詳咨覈發又歷欠各營出師官兵裹帶  
鍋帳藥鉛等項工料銀十七萬四千餘兩並前後傷亡弁  
勇截至光緒八年止應領卹賞銀二十萬七千餘兩已於

另案造冊咨明戶部俟將來有款支發再行造報補銷此外並無積年緩發現應補發之項其餘報部各款截至光緒八年年底止實在存庫銀六十四萬六百一十一兩九錢四分九釐二毫八忽四微四塵七纖覈與八年年底盤查銀數相符並無虧短挪移至甯遠府打箭鑪廳經管邊備臺費等項容俟隨時稽查覈辦又寶川局每年加鑄四卯餘息不敷撥供武職養廉自嘉慶年間以來積欠已鉅近因銅鉛短絀寶川局頻年缺鑄欠發廉餼錢文爲數尤多均應分別緩急別籌變通章程另案辦理等情請奏前來臣查四川藩庫自道光二十八年清查以後歷今三十餘年收支款項數逾數千百萬其間籌濟鄰饑以及本省饑

精款目繁多偶遇不能周轉之時騰挪挹注勢所不免茲  
經設局分款清釐覈與上年年終盤查數目相符實無虧  
短挪移情弊除飭藩司嗣後經管收支一切務須各歸各  
款永不准稍有籌墊濫支撥抵借動隱匿弊混以重庫款  
並咨部外所有清查川省藩庫完竣緣由理合恭摺具奏  
伏乞

皇太后

皇上聖鑒訓示謹

奏



變通補缺章程摺

光緒九年九月二十九日

奏爲川省候補知縣人員壅滯擬將參革一項仍歸外補  
請

旨飭部覈議恭摺仰祈

聖鑒事案查前准吏部咨嗣後各省知縣參革一項缺出  
概歸部選又終養與降補二項所出之缺暨修墓等項比  
照終養之缺一併改歸內選不得扣留外補則內選有丁  
憂終養參革降補四項歸選之缺而外補仍有升調病故  
休撤回改教迴避等八項留補之缺席內外俱得其平等  
因當經轉行遵辦在案茲據布政使張凱嵩署按察使崧  
蕃會詳遵查定例題調要缺專歸外補各項選缺原歸內

選嗣因捐例頻開分發各省人員多於內選是以准將選缺扣留外補今內選漸形壅擠自宜量爲變通現奉新章以丁憂終養參革降補四項選缺專歸內選而以升調病故休撤回改教迴避八項選缺留歸外補固係斟酌損益第查升調病故休五項選缺扣歸外補者向以各班人員挨輪序補其撤回改教迴避三項扣留選缺則係一卽用一候補相間輪用且此三項之中呈請改教者寥寥無幾參劾改教如在六月限外例歸休致迴避一項見缺更少是則候補班可望酌補者僅止撤回一項川省候補知縣積至二百餘員從前原有丁憂參革兩項選缺可以專補自丁憂缺歸選以後望補已難若將參革缺一併歸選則

軍功候補一班將同廢棄未免向隅夫內選原貴疏通而外補亦當體恤畸輕畸重此通彼塞均屬窒礙難行再四熟商悉心參酌除升調病故休五項選缺歷歸各班輪補毋庸置議外擬請將參革一項仍歸外補否則統計參革終養降補撤回改教迴避六項選缺各積各省做照選缺知州辦法留補四次咨選一次或照選缺直隸州辦法二留一咨抑或統將丁憂參革終養降補撤回改教迴避七項選缺一留一咨截缺無虞鞦韆序補亦無偏枯庶候補人員不致望補無期而內選外補亦兩得其平等情請奏前來

臣查川省候補知縣人員壅滯補缺無期委係實在情形且查各候補人員內亦多有堪以造就之員若竟令

補缺無期未免有棄才之歎合無仰懇

天恩飭部覈議將參革一項仍歸外補或統計分別咨留  
出自

聖主鴻慈除咨部外理合恭摺具陳伏乞

皇太后

皇上聖鑒訓示謹

奏

土司構衅查辦完結摺

光緒九年十一月初二日

奏爲麻書孔撒各土司等構衅滋事派員前往查辦現已辦結川藏地面一律肅清恭摺仰祈

聖鑒事竊照前據建昌道寶森暨糧員嵇志文等稟報北路麻書孔撒兩土司因事忿爭各向所親乞師助戰經

臣

等先派候補知府慶善並調派打箭鎗官土兵三百名前往辦理附片奏明茲於十月初一日差弁齋回原片欽奉批諭覽奏已悉該土司等稱兵構衅亟應開導解散卽飭令慶善等相機妥辦務令兩造及時撤退並查明起衅緣由持平斷結是爲至要欽此謹卽欽遵行知該委員等遵照又以夷性桀驁支庶繁多復添派熟悉夷情之署成縣

道丁士彬前往酌辦茲據該員等具稟霍耳五家土司本  
一脈相承後因年久世系無考遂分爲五姓互爲婚姻卽  
麻書孔撒朱窩章谷白利等是也上年章谷土司甲木參  
讓竹無子麻書土司四郎汪杰將生子汪欽瞻登贅婿於  
章谷甲木參讓竹故後汪欽瞻登卽接管章谷土司事務  
娶孔撒土司俄珠彭錯之妹爲妻生子紮喜旺甲嗣因紮  
喜旺甲之母病故俄珠彭錯與汪欽瞻登卽舅之間漸起  
猜嫌光緒六年俄珠彭錯與伊甥紮喜旺甲爲媒說訂朱  
窩土司四郎多登之長女爲婚旋被麻書土司四郎汪杰  
查知因未由汪欽瞻登主婚遂令將此女送回另與紮喜  
旺甲說訂懋功所屬綽斯甲之女爲媳孔撒與朱窩羞惱

成怒遂與麻書有兩不相容之勢時有瞻對番官作康色  
從中勸解令將所訂兩家之女均作罷論永遠不許過門  
以全和好而麻書土司四郎汪杰仍將綽斯甲之女訂妥  
孔撒土司等遂與麻書興兵械鬪經該處文武查知前往  
開導章谷麻書均已遵斷惟孔撒執拗不遵各土司等遂  
相持不下並各向所親乞師助戰麻書章谷瞻對爲一黨  
孔撒朱窩白利爲一黨各於要隘處所修築木柵樓礮  
臺互相攻擊商賈聞風裹足道路幾致不通此各土司等  
起衅爭鬪之實在情形也當孔撒之執拗不遵也其咎並  
不在孔撒緣朱窩土司有胞姪登澤羅布者其人陰賊險  
很向來交接匪類意圖乘機起事茲見朱窩章谷兩家因

事械鬪惟恐各土司等遵諭罷兵伊卽無隙可乘遂向孔撒播弄使各土司相持不下以便伊從中倡亂查該處有壽甯寺一所內有喇嘛二千餘人其中有科上紅牛克珍羅布崇旺登珠谷於甲果沙當布與登澤羅布向來交好又與章谷土司汪欽瞻登有隙登澤羅布遂糾串該喇嘛等煽惑蠻衆將章谷官寨圍困一面燒燬夷民房屋擄掠人畜並聲言扶登澤羅布作章谷土司擾亂二十餘日之久經慶善帶領官兵前往查拏並先行出示曉諭飭令各土司等將兵撤退聽候官爲判斷各土司等均各將夷兵撤回慶善至壽甯寺適崇旺登珠潛行回寺當卽拏獲登澤羅布暨科上紅牛等聞大兵將至遂棄章谷官寨率



黨百餘人至卡衆居弓地方土寨內聚集意圖抗拒慶善  
當派委員候補府經歷陳凱署角洛汛候補把總賈慶年  
外委馬紹鄰明正頭人包文明各帶土兵分往卡衆地方  
四面兜緝登澤羅布於寨內飛石抵禦並施放槍礮我軍  
受傷者四十餘人慶善與隨員等督同官土兵丁奮力攻  
撲一面挖濠斷其水道該匪力不能支下寨拒敵登澤羅  
布手執蠻刀大聲喊殺我軍槍礮齊施刀矛並舉鏖戰三  
時之久始將登澤羅布科上紅牛谷於甲果沙當布四名  
殲斃陣中生擒克珍羅布工達阿珠等二名餘黨潰散經  
官兵按名搜獲訊係脅逼同行當卽取保省釋此朱窩土  
司之姪登澤羅布乘隙倡亂殲斃陣中之實在原委也查

慶善於將至未至之時瞻對番官聞省中委員將至卽行帶領番衆退回巢穴慶善查拏登澤羅布章谷麻書朱窩孔撒白利五土司均在場目擊慶善隨傳集該土司等三面鞠訊該土司等均俯首認錯懇求公斷慶善以此案本由婚姻起衅必須將婚姻一事判斷清楚爲緊要關鑿查紮喜旺甲所訂朱窩土司之女與訂綽斯甲之女均已過門成婚若照作康色所議兩家之女均作罷論永遠不許過門殊非情理此時惟有分別嫡庶乃爲名正言順查朱窩之女訂在先綽斯甲之女訂在後斷令以先訂朱窩之女爲嫡妻後訂綽斯甲之女爲側室兩女分居各住庶名分正而紛爭息又復再三開導各土司等均各悅服遵斷

並具永不滋事切結備案慶善復親詣械鬪處所周歷查勘飭將木柵碉樓礮臺悉行折毀百姓所失牛馬器具斷令各土司等逐件清還原主其燒燬房屋亦斷令按戶賠修勒限完結傳集兩造夷人取具賠還無事夷字甘結在案並請將各土司等議處具稟請示前來臣等查川省藏衛地方南北兩路夷地均歸土司管轄該土司等自爲雄長各不相下是蠻觸相爭之事所在多有但一經臺員開導亦無不俯首聽從此次麻書與孔撒兩土司以婚姻細故逞忿相爭並不聽臺員開導糾黨助戰焚燒民房抄擄牲畜器具嗣經派員查辦而該土司尙意圖抗拒飛石抵禦並施放槍礮致傷官兵四十餘人實屬毫無忌憚雖事

後尙知畏罪痛悔前愆而事前之兇頑亦屬膽玩可惡應請將各土司等各予罰俸一年以示薄懲其瞻對番官始雖聽糾附和惟於慶善將至未至之時一聞委員前來查辦之信卽率領番衆退回瞻對尙知畏法姑准從寬免其置議登澤羅布等犯以不干己之事輒敢乘機倡亂負隅抗拒致傷官軍多名形同叛逆罪不容誅旣與科上紅牛等臨陣殲除應毋庸議登澤羅布仍應截取首級於該夷地揭竿示衆以昭炯戒克珍羅布一犯聽糾燒燬民房肆意搶劫亦屬罪大惡極當經批飭卽行就地正法崇旺登珠工達阿珠等犯訊係逼脅同行其情稍有可原惟燒燬殺擄均經在場未便稍涉輕縱亦應如稟監禁永不省釋

以示懲儆至署成縣道丁士彬候補知府慶善辦理此案往來於冰雪之中出入於煙瘴之地備極辛苦蕙事迅速不無微勞足錄相應籲懇

天恩准給丁士彬隨帶加二級慶善俟補缺後以道員用以昭激勸其餘隨同出力各員弁兵勇並傷亡各兵勇應由臣等分別酌給外獎及埋葬銀兩用勵勤勞而示矜恤除將該員等訊取各供結附卷存案並咨部外所有查辦完結各緣由合詞恭摺由驛四百里具奏伏乞

皇太后

皇上聖鑒訓示謹

奏

官運鹽局實支實銷並無閒款片

光緒九年十一月初二日

再前准戶部咨議覆光祿寺少卿延茂奏各省災區甚廣  
亟宜寬籌賑款一摺據原奏內稱四川官運局每年所得  
餘利甚多屢見奏報大著成效戶部有案可稽至於前總  
辦局務之唐炯幫辦局務之文天駿每年薪水皆各五千  
兩此皆有卷可查者竊恐此外無名之費不報部者不可  
稱數如於此等無名之費略加核實挹彼注茲似亦賑恤  
之一助等語經部覆奏四川鹽務總辦歲支薪水萬兩查  
報部係每員每月支銀二百兩與該少卿所奏之款不符  
其或積有閒款或糜費薪水或款不歸公部中皆無從考  
核行令逐一清查趕緊酌提解交部庫等因當經轉行該

局切實查明詳辦去後茲據總辦滇黔邊計鹽務候補道  
夏肯幫辦局務刑部郎中文天駿會詳道查開辦官運業  
經五次奏銷徵收支撥款目均照奏定章程辦理未嘗稍  
有參差稅羨截釐四項爲徵收正款每綱支存數目迭經  
造冊詳請咨部有案非奉文提撥不敢妄動分釐此外局  
費平餘防邊經費護本籤驗引底六項爲徵收雜款每綱  
據實造報可以按冊而稽亦不敢妄有混淆如局員薪水  
應由局費項下開支總辦一員月支銀二百兩幫辦一員  
月支銀一百兩總局四所及各廠岸分局凡正委一員月  
支銀五十兩副委一員月支銀三十兩著有定章從無冒  
濫延茂所奏總辦幫辦每年薪水皆各五千兩想係得之

訛傳並非事實卽如辛巳綱收局費銀十四萬六千七百七十兩所有開除薪水細數皆具於冊其支存銀一千一百三十四兩零前曾明晰報部絲毫未敢漏遺此局費之實支實報也平餘一項奏明提作道府州縣公費辛巳綱計入銀二十二萬七千七百兩零除支公費銀十九萬五千四百五十六兩並撥補護本銀三萬一千一百八十七兩外其存銀連上綱支存共銀一千六十一兩零亦經報部在案此平餘之實支實報也防邊經費一項收銀十四萬六千七百六十兩除支安定營月餉十四萬五千八百八十三兩七錢外其存銀八百七十六兩零並已報部在案此防邊經費之實支實報也護本一項每引徵銀一兩



而近兩三年內川河險灘層疊江水盛漲鹽船日有失事  
每年補配不敷甚鉅卽如辛巳綱收銀僅二萬九千三百  
五十二兩而補配應需銀六萬六千五百三十九兩有奇  
若非有平餘局費所餘借以挹注尙不可知此款由何而  
出至籤驗每引每關徵銀一錢五分隨卽照發各關縣引  
底每引徵銀一兩年終盡給舊商無有盈絀每次奏銷均  
經報部查考此護本籤驗引底之實在情形也以上雜款  
六項或出入相抵或盈絀不過數百兩至千餘兩不等惟  
平餘一項除支撥本省道府州縣各公費外卽略有贏餘  
尙須彌補護本之不足况收數多寡視行引之暢滯能否  
相抵無虧尙難預定固不得遽指爲餘利也統計前數綱

雜款下支存銀僅三千七十兩零係存儲在庫備提公用者本年奉撥京員津貼銀八千兩儘數詳解短絀猶多尙盼江行順利年終或有銖累之餘始能填補此外實無未歸公之閒款亦無所謂無名之冗費現在各岸河道因大水傾崖倒石窒礙船運亟需鉅款修理尙無所出至各員薪水暨司事人等工食似應仍舊以資辦公而勵廉隅卽令再行遽減錐刀之末無濟於事等情詳請奏咨前來臣查四川未辦官運以前鹽務每年正雜所得不及二十萬自開辦官運後每年正雜兩項收數均在一百萬以外所云利盡歸公者尙非虛語况年中收支一切均經嚴飭該管局員力求核實不准絲毫浮冒隱匿臣按月令開摺呈

報稽核並無一月廢弛又須於奏銷時再爲逐細句稽考  
核實屬實支實報委無未盡歸公閒款除咨部外理合據  
實陳明伏乞

聖鑒訓示謹

奏

法人併越擬練川兵以備緩急摺

光緒十年正月十一日

奏爲法人併越大勢將成現在中國亟於拯救勢恐再變北洋近接

京畿急須多方戒備不可偶失以固根本現擬將川省留防各勇營勤加操練以備緩急恭摺密陳仰祈

聖鑒事竊維法人之謀併越南其端雖著於越南其意尤注於滇粵而臣私計滇之受害必先於粵而甚於粵現在

越南君臣舉國求和已屬名存實亡中國若不急於拯救則滇粵藩籬已撤後患滋大然急於拯救而法人視己覆之越不得逞志心斷不甘勢必到處滋衅則爲患又不止於滇粵而將及於北洋雖洋面有南北之分而輪船所歷

處處可至但使滇粵兵勢一盛法人必由廣東福建江蘇  
山東洋面直趨天津或分擾山東

盛京各路令我彼此牽掣防不勝防且聞法人亦習陸戰  
性尤忍鷙年來在越南與劉永福相持亦多陸戰乃屢敗  
而氣不沮即可概見儻彼不得志於越南突入北洋舍舟  
而陸又恃其槍礮精利併力於我恐非尋常之兵勇所能  
爭勝况現值直東多被水災饑民頗衆中國雖竭力賑撫  
亦有時而力窮設此輩逃亡之餘乘間內譟又或法人乘  
機動之以利誘之以食使爲前驅則一呼四應自在意中  
臣謂法人計若出此則中國備多力分到處牽制此更宜  
早爲計及又北洋各路密邇

神京多者十數日少者數日便可擾及兼以京城地大人  
眾風鶴稍警易致倉皇尤極可慮臣思念及此寢食不安  
自維受

國厚恩當此時勢無可爲報何堪爲人現擬將川省留防  
各營勇親加訓練逐日勤操庶使一力一心有前無怯以  
備緩急而期致果如將來查看法人有北趨情勢仰懇

密諭到川

臣

卽督率星馳前來與北洋大臣李鴻章等稍

助一臂共衛

神京冀遏狂氛而定眾志

臣

之此舉非敢好爲多事冒昧

上陳誠念時事艱難至此亟欲爲

國効命稍盡區區圖報萬一不勝懇款待

命之至謹恭摺密陳伏乞

皇太后

皇上聖鑒訓示謹

奏

預防法人句結日本片

光緒十年正月十一日

再查外洋各國自入中國以來均多以通商爲要務惟俄法日三國雖曰通商僅有虛名其實皆藉口以攪擾中國此真所謂封豕長蛇不可以情遣理論者也臣謂此次法人欲併越南其意以爲與中國毗鄰而居諸可任性圖便且前聞曾發狂言有圖越不得將南犯廣東北闖天津之語固係恫喝之詞然果與用兵則到處竄擾勢所必至而臣尤有意外過慮者現在橫恣狙詐莫甚於俄法日三國而俄人自逞其雄且新定中俄界務一切已多得便宜必不屑與法通且法人若併越南亦其心所最忌惟日本素無信行直同無賴上年高麗之事中國辦理得手私心已



不甘服臣竊恐法人以兵力不及中國或陰與日本勾結  
分之以利約其於閩浙一路從旁牽擾或暗中啖以厚賄  
俾其合力以肆擾於北洋日本惟利是圖斷無不樂從之  
理臣但願法人計不出此則北洋事尙稍緩若爲此詭謀  
則禍必速而害且大此誠目前急務不可不思有以備之  
臣擬請

皇上速諭駐日本大臣黎庶昌悉心密探該國情形但與  
法人有交通消息卽行密報來京以便迅爲調度一切預  
伐其謀愚昧之見是否有當謹附片密陳伏乞

聖鑒訓示謹

奏

成都駐防添設拔額摺

光緒十年正月二十四日

奏爲請增拔貢定額以宏作育恭摺會奏仰祈

聖鑒事竊照成都駐防自嘉慶初年准令旗童凡遇歲科兩考就本省學政考試入學歷年以來士子皆深自振拔爭相濯磨所有廩膳生

恩貢歲貢均經照例充補惟拔貢一階未經舉行茲據八旗協領塔斯杭阿等稟稱本省歲科兩考駐防旗學每次已取進十名多士涵濡日久人文蔚起現在應試文生實有一百餘名其間敦品勵學堪膺選拔者殊覺不少懇請添設拔額等情稟請具奏前來臣等會查無異核與學校人數至百餘名再增選拔之部議相符且此後士氣奮興

將來人數必有加增合無仰懇

天恩俯准將成都駐防旗學添設拔貢二名俾遇選拔之年照額拔取以彰

樂育如蒙

俞允卽請自本屆乙酉科爲始會同秉公遴選認真考核用副

聖主鼓舞學校拔取真才至意謹合詞恭摺具陳伏乞

皇太后

皇上聖鑒飭部議覆施行謹

奏

川省應解京餽仍發商匯兌片

光緒十年正月二十四日

再臣准戶部咨開片奏停止匯兌一案行令各省自光緒十年爲始所有應解部庫地丁鹽課各項銀兩概令籌備足銀委員裝鞘親齎到部交納勿得再行匯兌以重餽項而杜弊端等因當經轉飭遵辦去後茲據署藩司如山詳稱細察部咨令委解現銀原爲慎重庫款起見惟查川省情形與他省不同西商銀號與南商迥異他省南商銀號或根底未深或交易太濫不免凌空蹈虛之弊其倒閉實由自取川省銀號向無南商止有西商均係家道殷實懋遷有無多歷年所公私款項從無虧短與南省阜康有別川省西號現在承領官項者有九家皆連環互保以每次

解銀二十餘萬兩計之每號每次不過匯兌銀二萬餘兩  
爲數無多交納不致遲誤卽有意外之虞一家倒閉八家  
分賠斷不能同日歇業公款不慮無著銀數以分而見少  
追賠亦易爲力且該西商諗知每年必有銀兩匯京亦必  
預爲籌備京都市廛貿易亦可藉此周轉茲一旦頓改舊  
章不特委員齎解現銀赴京長途跋涉疏失堪虞而目下  
山東直隸一帶饑民覓食良莠不齊亦甚可慮近聞山西  
各處亦多搶劫之案兼以沿途州縣應付車則需七八十  
輛馬則需百數十匹夫則需三四百名傳乘旣多擾累輾  
轉更延時日不若匯兌之較爲穩便再四體察由商匯兌  
旣於民廛無礙復於餽需利便等情請奏前來臣查餽項

要款首以慎重為主尤以迅速為先川省撥款繁多轉運為艱沿途護解不易委係實在情形合無仰懇

天恩俯准將川省應解餉銀仍發商匯兌赴部呈繳實銀用期妥速俟直東饑民漸少道路安靖再行照章改辦委解實銀亦係慎重辦理是否有當理合附片具奏伏乞

聖鑒訓示謹

奏

喇嘛攘奪廓商財物派員查辦摺

光緒十年二月二十日

奏爲前藏喇嘛攘奪巴勒布商民財物日久未結恐滋他事籲懇

天恩派員查辦以清邊患恭摺由驛具奏仰祈

聖鑒事竊查光緒九年九月准駐藏大臣咨以本年三月初一日前藏喇嘛乘間攘奪巴勒布商民財物一案當經具奏奉

旨妥辦曾將奏稿咨鈔到

臣

查原奏內稱該喇嘛照約退

還漢銀七八千兩巴勒布商民未肯承領等語

臣

以該喇

嘛攘奪廓番其曲實在喇嘛現經飭查該喇嘛乃僅稱所據銀止七八千兩之數而巴勒布則稱被劫有三十餘萬

兩銀數大相逕庭即使巴勒布果有浮報似不應如此懸殊竊恐該喇嘛所稱不足憑信且查廓番在藏貿易有年尙不滋事爲非此次喇嘛恣意攘奪取怨鄰封臣以事關中外如不早爲完結勢必別滋他事當卽據情咨詢駐藏大臣並作函諄囑務必轉飭前往濟隴交界會辦之委員等秉公妥辦切毋稍有偏護轉致日後爲難等情迄今數月之久未據咨覆前來究竟目前是何情形不能懸揣然心竊憂慮每於接見僚屬及由藏公回委員詳加詢訪有謂喇嘛認賠贖銀過少廓番誓不甘心招來番衆數萬聚集交界地方勢將用兵而喇嘛橫不依理不知自咎輒擬與之迎敵者有謂該大臣等派去委員劉鈞趙咸中已被



廓番擄去者道路之說紛紛不一雖未足憑信而揆情度  
理決非無因查廓番被劫屬實在事後浮開賊數原難保  
其必無然以<sub>臣</sub>所聞攘奪實有三十餘萬之多今喇嘛僅  
止認賠銀七八千兩不足十分之一卽欲了結此案揆之  
情理本覺難安而喇嘛虛狡如常頑梗不化難以言論理  
遣今得贖銀數十餘萬兩各族俵分不能全數完繳自在  
意中但似此兩相抗拒已成不了之局若不設法早結勢  
必釀成大事爲害甚深伏思川省之與藏衛唇齒相依曷  
敢稍分畛域致誤事機但擬卽由<sub>臣</sub>等就近委員往辦殊  
於體制有乖若請

旨簡放大員前往西北相距萬有餘里至速亦須八九月

始到現在爲日已久枝節叢生若再遲延將有不可收拾之勢再四思維竊擬由川揀選委員請

旨特派前往辦理較爲便捷而川省亦難求此得力可任之員惟查有候補道丁士彬人甚明幹辦事深穩現已委赴襄塘查辦劃界事務距藏較近可否籲懇

天恩特飭該道就近前往查辦其一切機宜由臣等隨時籌畫妥爲指授至事機辦理如何之處得有頭緒由該道稟由臣等據情轉奏聽候

飭遵惟查廓番被劫過多此次辦理斷難平空了結此時若不妥籌善策終恐無以折服其心難期濟事第思不賠贓銀則巴勒布誓不甘心而該喇嘛所得各贓早經分散

亦難望其賠還藏中又無款可墊如

飭由他處代籌賠款不惟有失

朝廷體制亦愈長該喇嘛等刁風臣等愚擬俟派員辦有

端倪後由臣等再行仰懇

天恩推柔懷遠人之意明降

諭旨於被劫三十餘萬之數或賞給廓番銀三四分之一以示矜恤似屬名正言順至此款若須應用暫時由川措給俟完案後必令藏中分作三四年繳還歸款一面仍飭該駐藏大臣勒令鐵棒喇嘛將爲首滋事搶奪之喇嘛交出照例懲辦明正典刑以彰

國憲而順番情至該大臣事前不能約束喇嘛事後又不

能迅速了結本難辭咎惟近來藏番族數既衆又復異常  
桀驁該大臣辦理此事其中實有許多爲難之處應懇

天恩曲加鑒原出自

諭格鴻慈臣等爲中外交涉恐滋事端起見知而不言寢  
饋不安籌計稍遲又恐貽誤用敢不避嫌怨冒昧直陳不  
勝悚惶迫切待

命之至所有前藏喇嘛攘奪巴勒布商民財物日久未結  
請員查辦以弭邊患緣由是否有當謹會同成都將軍宗  
室臣岐元合詞具奏伏乞

皇太后

皇上聖鑒訓示謹

奏

奏稿卷二十三

五

解部減平減成等款仍留川備撥片

光緒十年二月二十八日

再川省應解減成減平各銀兩前經臣據實奏明暫請留備各路饑需嗣准部咨行令按年按款提還補解等因當經轉行遵辦去後茲據署布政使如山詳稱遵查川省減成減平等項銀兩本係應行解京之項前因川省庫儲萬分支絀京外各饑籌無可籌詳請奏明仍留川省湊濟急需實出於萬不得已嗣奉戶部議覆仍令如數解京並於動撥減平銀兩案內節次飭令如數提還如再挪移拖欠卽照地丁錢糧例參處等因如果川庫稍可支持又何敢故意違延致干嚴譴第川省地丁課稅向來入不敷出勸辦津捐釐金歲只收銀二百六七十萬兩除撥補本省例

支兵饗臺費等項又本省巡防兵勇口糧每歲需銀八十餘萬兩約只餘銀一百五六十萬以爲協濟京外各饗之需覆查京外協饗近來愈撥愈多卽以光緒九年計之共奉撥京外饗銀三百餘萬兩除由官運局籌解外共由司庫撥解銀一百八九十萬兩較之餘存津捐釐金計多解銀二三十萬兩全賴庫存無論何款隨時通融籌撥勉強顧全大局而欠解各路協饗尙有數十餘萬之多若將減成減平銀兩再行提解赴京則此後奉撥各路協饗旣無挪湊之資又乏生財之術必致愈欠愈多設誤要需所關更鉅况川省收支津捐釐金均已按年造冊報部現又將光緒六七兩年收支正雜各款趕緊造冊具報所有川省

津捐釐金等款是否足濟京外協餉及本省兵餉臺費防費等項其減平減成銀兩能否如數解京上納部中不難通盤酌核等情詳請奏咨前來臣查川省庫儲支絀撥款日增應解餉需無項湊撥委係實在情形合無仰懇

天恩俯准將養廉減成及各項減平銀兩暫行仍留川省湊撥各路餉需容俟日後撥款減少籌解不致爲難再行遵照如數解京以期中外兼顧出自

逾格鴻慈除咨部外謹附片陳奏伏乞

聖鑒訓示謹

奏



查明收支庫款並弁勇數目摺

光緒十年四月二十九日

奏爲查明川省光緒六七兩年額收實收額支實支並官弁兵勇各數目恭摺奏

聞仰祈

聖鑒事竊照光緒九年八月准戶部咨奏准裁撤派辦處歸併北檔房行令將各該省無論司庫釐局營防善後鹽關漕等該管各衙門所有一切舊有新增有額無額正雜出入各款項由各該省督撫彙總查照光緒六七兩年歲出歲入款項數目官數兵數勇數簡明清單送部入項逐款先列額收次列實收出項逐款先列額支次列實支散款散數開齊再以散合總開列一省通收通支總數並令

各該省將此兩年有無應收未收應支未支之款一併詳開無論從前已報未報此次均仍通查一次勿稍含混遺漏限於本年十二月封印以前到部以備考核等因當經分行遵辦去後茲據署布政使如山詳查川省額徵地丁課稅並一切雜款歲僅收銀一百三十餘萬兩而每歲例支之款共需銀一百六七十萬兩故川省向爲留備省分所入不敷所出歲須鄰省協濟銀二三十萬以濟供支軍興以來不惟鄰省協濟毫無並須川省勸辦津捐等項接濟京外饑需近年奉撥京外協饒愈撥愈多卽以光緒九年計之奉撥不下三百餘萬兩津捐釐金歲只收銀二百五十萬兩除撥供本省兵饒臺費銀三十萬兩防軍口糧

約需銀八十餘萬僅餘銀一百四五十萬兩尙不及奉撥銀數十分之五應解京外各饒均關緊要斷不敢概置不顧不得已暫將奉文提解之減成減平及歷存正雜各款儘數搜括挪湊九年分共解京外饒銀一百八十餘萬兩而各省催解之文尙復紛至沓來應解減平等款又准部咨催解現計十年撥款愈多收款愈絀誠不知作何籌維是以前次奏請將減成減平等款暫行留川湊撥原出於萬不得已茲准部咨飭將川省官數兵數勇數並六七兩年額收額支實收實支一切款項全數造冊齎呈自係統籌各省出納斟酌盈虛起見應卽遵照趕緊造報俾川庫支絀情形部中得以洞悉謹將官數兵數及現在勇數逐

一查明造成一冊並將六七兩年收支各款逐年查明額收實收額支實支各數目無論已報未報一律造具清冊至各年奏銷內有由此案撥供彼案之項或六年補銷五年七年補銷六年之款無關各該年實收實支者均一概不造入冊其有六七年收支之項而歸入七八年造銷者仍造入六七年冊內並於冊內登註明晰以便按年稽核並免重複混淆統計光緒六年分共收銀四百四十八萬四千六百八十三兩零共支銀四百五十六萬四千六百兩零七年分共收銀四百六十一萬九千一百五十兩零共支銀四百八十六萬四千七百二十二兩零其支數溢於收數係動有六年以前存項所致收支各款中間有尙

未造報者現在趕緊按年造銷斷不敢久事稽遲等情詳請奏咨前來臣覆查無異除冊咨部查核外理合恭摺具奏伏乞

皇太后

皇上聖鑒再川省款目繁多誠恐錯漏是以造報稍遲又官運局收支各冊前已咨送合併陳明謹奏